

ke' na wal m'pizit

yan sami tayal nyux maki te yatux ska na rgyax hiya ga, tmubux sami trakis ru pagay mma', yasa qu qqyanux myan ini kiyan hugal muya pagay slaq, qutux kawas ga minqutux balay kmloh, trakis uzi ga minqutux balay mahuw, qutux qutux kawas aring mkhpah qzimux zqalux lga, tmubux sami trakis ru aring mk'ali lga tmubux sami pagay la.

huqil bukil lga mahuw trakis, tehuk ska 'bagan lga kmloh pagay la, yasa qu pqumah na tayal hiya. nanu yasa qu siga qniyat ta mqumah ru ini ta qlangiy mlahang mwah maniq na pizit ga blaq qu pinbahuw ta uzi pi.

yaqih balay qutux qu pizit qani ay, ini ta khangiy ga si nya suqi maniq trakis ini ga pagay, kahul inu qu pizit mucu su? anay misu pnqizyu' minkahul inu qu pizit qani; mrhuw kinbkisan raral ga ini ta lux mqumah ma, tmubux trakis ini ga pagay uzi ga si nya truqiy cikay, tnaq nya ki'an sazing cyugal puqing trakis ini ga pagay lga tnaq nya sqyanux qutux ngasal qutux kawas ma, baha hmswa qutux bwax trakis syun nya sa kyawan ru 'mukan nya na bluku ru "puy" son ta ru szwi' su cikay suruw ru gyahan su lga nyux qutux kyawan trakis pinhapuy lma, pagay uzi ga yan nasa uzi. ini ga musa ta mkal lpyung cyux maki twahiq, si ga musa su krusa tuqiy mucu ga syun su qingay bwax trakis ru musa lga iyat su nbah t'uzay

tuqiy, ini mlux mk'guy mpanga bwax.

ktan mga maki qutux yaki kya mnglung mucu; ana qutux bwax phpuyun lga memaw soka balay niqun, si ta sxali phapuy pizyux ga aw ini qzinah blaq niqun, kana m'guy phapuy mucu lru si nya qopi qutux qba puyun nya, alay mqas qu yaki pqaniq ta balay hminas ssbing na mami mucu ru aki nya gyahan mga, si kita "pok" mucu tb'ka qu kyawan, si ka "bul bul" mhtuw kya qu pizit, si qlqala qu yaki si 'nkux lma.

ktan mga si ka pit pit mlaka qu pizit musa tpaq kya llyuw na apuk mru si kayal mucu; "swa su iyal kins'ari inlungan su, abas su iyal isu, aring sqani ga musa simu mt'buk mqumah ga p'uluw simu trakis la, huqil trakis mnuya mamu lga wahun myan maniq uzi", mucu mru wal mlaka wayal lma.

aring kya ita tayal ga nanu si ga lokah ta mtzywaw ga p'uluw ta niqun, ini ta pkhmu' s'ari ru mqilang ta mtzywaw, mucu pinung maku ke' ni yaya maku.

(文章大意 僅供參考) ※字數限 200 字

麻雀的故事

從前，祖先不用辛苦耕作，兩三根小米或陸稻的種子就夠全家一年所需。只要將一粒小米放進鐵鍋蓋鍋蓋，「咻」一聲對著它吹，就成了一鍋煮好的小米。如果要走二夜的路程，只要將九粒小米放進耳飾，就不會在路上餓著。

一位老太太抓了一大把小米去煮，結果鍋子裂開，麻雀從鍋子裡飛出來。麻雀說：「妳怎麼那麼貪心？從現在起，你們要辛勤工作才有小米吃，小米成熟後，我們會來吃。」從此以後，人們要很努力的工作，才会有食物吃。

mita' spi'

gaga' qnxan na binkaysan ta' 'Tayal sraral ga, mutu nha' spwah sa
“spi' ” kwara' qu krahuh' na zyuwaw. spi' qu ktan nha' ru pspngan nha' sa
zayzyuwaw musa' blaq ini' ga musa' yaqih. yani qu son na bnkis maha
“mita' spi'”, ini' ga “talam spi'”, yasa trhgung balay mita' ru syun inlungan
na Tayal.

pzyang nha' balay krahuh' mita' ga, nanu' yaqu musa' mgaga'. ini' ga
musa' mtcirih qani. mutu nha' abas s'usa' tmatak tuqi ru s'abi' nha' pspi'
mlhngan. maha ni yaqih qu spi' nha' ga, si 'bzinah kya ha. ru siki snaga'
nha' blaq qu spi' nha' lga, musa' mzayzwi' la. aw ru mutu yaqu zayzik na
pnayang ini' ga pkbalay ngasal. skita' nha' spi' uzi qu inlungan nha' maha
ga, kana pkzyaqih qu pincywagan ma. aki mwa' kinhzyuci' ru mqtuqi qu
zyuwaw. ini' mlux kinhtuw ana qutux ru magal qilis qu Tayal.

kwara' qu ppcywagun ga, skita' nha' spi' kwara'. maha nanu' qu
pinspangan blaq ru yaqih pi? blaq hya' mga: smpi' su' msunu', nyal mwah
qu knayril ini' ga bnkis, ana mtakuy ga si gluw magal nnanu', nyux ta' mqas
balay pinqzyu' nnanu', smbu' qsinu, pnbwan ta' qwaw na squlih, ana mnbu'
ga nyux ta' mlaka', wal ta' galun bniq na squlih, mkblaq na lukus, mslapa'

qu punih ga musa' blaq qu kayal, msqalu' qu qulih ga pqwalax qu kayal,
mnbu' mhikang mga pklawkah su' lma.

musa' yaqih hya' mga: mnbu' m'abi' ru plheq, mqlwi', mslom ngasal,
mtakuy ta' taytuqi, nyal si cinhmut qutux squlih, mthirih qu qayqaya' nyux
slsulun, mqhzyaw magal qayqaya', ini' gali bniq na squlih, katun huzil,
tmutu' qhuniq ga, p'agal su' qilis ma ; mslom lukus, katun tryung ga pnbu'
phuqil qu squlih, mhutaw g'nux ga p'ulu zyuwaw qutux ngasal, mtgazyaw
qhuniq ga phutaw su' mkaraw qhuniq. smpi' ta' mqlwi' ga yaqih, aw ga,
wal ta' nha' galun lmga qenah blaq yasa hya' lma, wal ta' nya' galan tunux
ru ini' balay pzyuy qu hi' ini' qbaq mgyay, wal si khutaw qu lalaw, tawkan
mga, psaniq nha' balay qani hya' la. mutu psbil squlih ma.

nanu' yan qani qu snbil na bnkis ta' Tayal qu son maha gaga' na “mita'
spi' ” qani.

(文章大意 僅供參考) ※字數限 200 字

泰雅夢占

早期重大事情都由解夢判別吉、凶，是泰雅先祖們很重視的事。

尤其出草、征戰前及開墾耕地及建造房屋前，勢必經由夢占取決。

吉兆：夢見洪水，有女性或老者來訪，即便跌倒而能拾獲某物，興奮的談述射獲獵物，他人請喝酒、病體中翱翔天空、接獲他人贈物……。凶兆：病體中睡覺且臉色慘白、溺水、火燒屋、行走中跌倒、有人憤怒而來，隨身物品器具毀壞、拒收他人的贈物、被狗咬或夢見在砍樹則將有血光之災……均為先民留下有關夢占的祖訓。